



№ 8

23 თებერვალი 1914 წ.

მიიღება ხელის მოწერა

წლიური ფასი

== 3 მან. ==

სოციალ-დემოკრატიული საზოგადო-ეკონომიური

და სალიტერატურო შურონალი

წელიწადი მესამე

ცალკე ნომერი 5 კაპ.

რედაქცია ღიაა 9-3 საათ.

მისამართი: თბილისი, გაბაევსკი პერ. № 3 რედაქცია „კლდე“. დეპოზის: თბილისი კლდე.

ს ა რ ხ ე ვ ი:

1. იდეალი თუ პოლიტიკა. — ა — ისა.
2. სომეხ-ქართველთა ერთეულობა. — ს. და-დიანისა.
3. მიწის საკითხი. — ტყვიასი.
4. ხიზანთა საკითხი.
5. მცირე განმარტება.
6. არ გვინდა ქართული ენა. — თრითინისა.
7. ვერძენელი ქალი (მოთხრობა) თარგმ. — ალ. სარაჯიშვილისა.
8. უკანასკნელი ამბები.

მიიღება ხელის მოწერა 1914 წ.

სოციალ დემოკრატიული საზოგადო-ეკონომიური

და სალიტერატურო შურონალი

„კლდე“-ზედ.

ფ ა ს ი:	1 წლით.	.	.	.	.	3 მან.
	6 თვით.	.	.	.	.	2 მან.
	3 თვით.	.	.	.	.	1 მან.

ცალკე ნომერი ყველგან 5 კაპ.

## იდეალი თუ პოლიტიკა?

ჩვენ გვაწერენ ისეთ აზრებს, რომელსაც ჩვენ შემეცნებაში ადგილი არ უნდა ჰქონდეს. „სახალხო გაზეთი“ მესამედ იმეორებს იმ აზრს, ვითომც „კლდეს“ ჰგონია, რომ ბურჟუაზიული იდეალი ერის იდეალად უნდა იქცეს. ჩვენ ასეთი აზრი არასოდეს არ გამოგვიტყვამს, რადგანაც არსებითად ამისთანა რამ გაუგებრობად მიგვაჩნია. „სახალხო გაზეთი“ მხოლოდ გრძნობს ამ გაუგებრობას, მაგრამ ვერა ხსნის, ამიტომ ჩვენი ვალია, ერთხელ და სამუდამოდ რომ თავიდან ავიციდინოთ ეს ბრალდება, უფრო მეტი ვსთქვათ იმაზედ, რასაც „სახალხო გაზეთი“ სწერს ერის იდეალებზედ.

ერის იდეალებზედ ღაპარაკი საზოგადოთ გაუგებრობაა. იდეალი ერთგვარი სავალდებულო და გარკვეული შეგნებაა. ვისაც იდეალი აქვს—იმას მოქმედების გეგმაცა აქვს. შეიძლება განა ითქვას, რომ ერს, როგორც მრავალფეროვან ელემენტთა რთულ კრებულს, რამე იდეალი აქვს? შესაძლებელია განა ითქვას, რომ ესა და ეს ერი ამა და ამ იდეალისაკენ ისწრაფვის? თამამად შეიძლება ითქვას რომ არა! ერი, როგორც რთული სოციალური ორგანიზმი მარტო სოციალურ დინამიკას ემორჩილება. მას ერთადერთი ნიჭი აქვს, ნიჭი განვითარებისა. საითკენ მიდის ეს განვითარება? მხოლოდ წინ! და ეს „წინ“ იდეალი არ არის, ესე იგი გამორკვეული რამ. ერს, როგორც რთულ სოციალურ ორგანიზმს, რომელიც მუდამ განვითარების პროცესში იმყოფება, იდეალი რომ ჰქონდეს, მაშინ წინა საუკუნოებს უნდა სკოდნოდათ, რა მოხდებოდა შემდეგ საუკუნოებში. მაგრამ ეს ასე არ არის. ახალ ვითარებას ჩვენ მხოლოდ მაშინ ვეცნობით, როცა იგი წარმოიშვება ხოლმე—მანამდისინ კი იგი ჩვენთვის უცნობია. მაშ როგორ ხდება საზოგადოებრივი განვითარება თუ მისი განვითარება უიდეალოა—გვეტყვიან ჩვენ? ასეთი დასკვნა შეცდომა იქნებოდა. ჩვენ ვლაპარაკობთ არა იმ ზედმოქმედებაზედ საზოგადოთ იდეალებსა და ერს შორის, რომელიც მართლა არსებობს, არამედ იმ წინად განზრახულ და აბსოლუტურ იდეალებზედ, რომელსაც უდებენ საფუძვლად ერის განვითარებას ზოგიერთები. ერის იდეალებზედ ღაპარაკი იმითომ

ვერ უძღვებს კრიტიკას, რომ იდეალი—როგორც ქეშმარიტება ერს ერთი უნდა ჰქონდეს. ნამდვილად კი სხვა და სხვა ინდივიდებს და სხვა და სხვა კლასებს, რომლებიც შეადგენენ ერს, სხვა და სხვა იდეალები აქვთ. ეს იდეალები პირიქით, ერთმანეთს ებრძვიან და თუ ვერა სპობენ ერთმანეთს, მხოლოდ იმიტომ, რომ ამ ბრძოლაში იდეალები იმ ლურსმნებს გვანან, რომლებიც მით უფრო ღრმად ერქობიან, რამდენიც უფრო მეტს ურტყამენ მათ. ამით აიხსნება სხვათაშორის ბატონობა ერთსა და იმავე დროს ძველის და ახლის შეგნებისა.

მაშ რაზედ ვლაპარაკობთ ჩვენ, ან, რაც უფრო უკეთესია, რა აქვს ერს, თუ მას იდეალი არა აქვს? საქმეც ეს არის! ერს პოლიტიკა აქვს. თანამედროვე ერთა ვითარება ისეთია, რომ მათი პოლიტიკა ბურჟუაზიულია და ეს ბურჟუაზიული პოლიტიკა იმავე დროს ეროვნულია. ამიტომაც ჩვენ ვლაპარაკობთ ბურჟუაზიულ პოლიტიკაზედ და არა ბურჟუაზიულ იდეალებზედ. მაგრამ როგორ ხდება, რომ იმ დროს როცა ერთი ეროვნული იდეალი არ არსებობს, ერთი ეროვნული პოლიტიკა არსებობს?! აქ გასაოცარი არაფერია. ყოველთვის და ყველგან პოლიტიკა გაბატონებულ კლასის ხელშია, და სწორედ ეს გაბატონებული კლასის პოლიტიკაა იმის მაჩვენებელი, რომ ერის ცხოვრებაში არსებობს მხოლოდ მეუფება ინტერესებისა და არა იდეალი. ბურჟუაზიის პოლიტიკა იმიტომ არის იმავე დროს ეროვნული პოლიტიკაც, რომ ამ პოლიტიკას ბურჟუაზია ყველასთვის სავალდებულოდ ხდის. იგია ფაქტიური ბატონ-პატრონი მდგომარეობისა, იგი სწერს კანონებს, მას აქვს ძალა დაიცვას ეს მდგომარეობა და ამას შედეგად ის მოსდევს, რომ რაც უნდა არ ეთანხმებოდნენ ამ პოლიტიკას სხვა და სხვა ინდივიდები, სხვა და სხვა კლასები—ასრულებით მაინც ასრულებენ, წინააღმდეგ შემთხვევაში საქმე რევოლიუციასთან გვაქვს, როცა არავითარი პოლიტიკა ესე იგი ბატონობა განსაზღვრულ კლასისა არ არსებობს.

როგორია ახლა ვითარება საქართველოსი? როგორია მისი პოლიტიკა, ვის ეკუთვნის გეგმონია? „წმინდაა და მტკიცე ის დროშა, რომელიც ჩვენ ავიღეთ ხელში და რომელიც მხოლოდ ერთი გაუძღვება ქართველ ხალხს აღორძინებისა და განახლებისაკენ“, ამბობს „სახალხო გაზეთი“. რანაირია ეს დროშა? სოციალისტური! რანაირია ქართველი ხალხი—ყოველწოდებრივი, და იმ დროს, როცა საქართველოს გლეხობა პირველად ეკიდება

კერძო საკუთრებას, როცა მისი ახალგაზრდა ბურჟუაზია პირველად იჩენს თავს, და, როცა თვით თავად-აზნაურობაც იძულებულია უარჰყოს არსებული წესები და ახალს დონეზედ წარმართოს, თანამედროვე ვითარებას შეუფარდოს თავისი ვითარება, ერთის სიტყვით, როცა მთელი ახალგაზრდა ბურჟუაზიული საქართველო პირველად განიცდის თავის „მაკრობის თვეს“, ამ დროს გამოდის „სახალხო გაზეთი“ და მთელ ასეთ საქართველოს, ასეთ ქართველ ხალხს თავის სოციალისტურ კალთას აფარებს, მე წაიყვან ასეთ საქართველოს განათლებასა და აღორძინებისაკენო. განა ასეთია ფედერალისტების პროგრამა, განა ასეთია სოციალიზმი?!

ძალიან კარგი თუ ასეთია ჩვენც ასეთ პროგრამას ვეძებთ, მაგრამ დაიცავით მაშინ კერძო საკუთრება ამ გლეხებისა, უხელომძღვანელო ქართველ ახალგაზრდა ბურჟუაზიას, ეცადეთ გადმოხაზოთ არსებული თავად-აზნაურობა ახალის ვითარებისაკენ, გახსენით ბანკები, სავაჭროები, დააარსეთ გლეხთა კავშირები, ბურჟუაზიული დაწესებულებანი და დაიცავით მათი ინტერესები, რადგანაც ეროვნული პოლიტიკა მარტო ეროვნულ უფლების დაცვა არ არის. ეროვნული პოლიტიკა ძალიან ხშირად იმ კლასის ინტერესების დაცვაა, რომელსაც ეკუთვნის ფაქტიურად საქართველო, თავის მიწა წყლით, თავის ვაჭრობით, თავის წარმოებით. და ეს უნდა ჩაიღწიოთ იმიტომ, რომ არ შეიძლება დაიცვათ ცარიელი საქართველო და არ დაიცვათ თვით ქართველები, არ დაიცვათ ის ინტერესები, რომელიც აქვთ ამ ქართველებს.

მაგრამ საქმეც ის არის რომ ამ-ს ჩადენა ამ ჯგუფს არ შეუძლიან, არ შეუძლიან პროგრამულად მაინც, რადგანაც ეს პროგრამა სოციალისტურია. სოციალიზმი კი მოითხოვს ქართველ ახალგაზრდა ბურჟუაზიის წიაღშივე დარბევას, გლეხთა კომუნალურ მიწად-მფლობელობას და არა კერძო საკუთრებას, პროფესიონალურ ორგანიზაციების დაარსებას და არა ბანკებისა, პარტიულ საწვრიმლო დუქნების გახსნას და არა დიდ სავაჭრო სახლებს. შეუძლიან ასეთ პროგრამას ქართველი ხალხი განახლებისა და აღორძინებისაკენ წაიყვანოს? ჩვენ განვიცდით ყველაზედ უდიდეს, ყველაზედ საინტერესო ხანას, რომელიც კი ჰქონია საქართველოს მრავალ ხნის წარსულში. ეს არის ხანა საწარმოვო ძალთა და ტენიკის განვითარებისა, ეს არის ხანა სიმდიდრის დაგროვებისა, ურომლისოდ კულტუ-

რას არავითარი წონა არა აქვს, ასეთ ხანას ქართველობა შეხვდა დასვენებულის ძალით, ისტორიულად შემუშავებულ უნარით, ქარსა და ცეცხლში გამოვლილი. ყველა ეს იმის მაჩვენებელია, რომ გამარჯვება მისი უზრუნველყოფილია, იგი შეჰქმნის თავის მომავალს. საჭიროა მხოლოდ მისი ნორმალური პირობები. ჩვენ არა ვქმნით ამ პირობებს, თვით ცხოვრება ჰქმნის მას, მაგრამ ჩვენი მოვალეობაა ვსთქვათ ერთი სიტყვა: სოციალიზმი კი არ წაიყვანს მას ამ გზით, მას წაიყვანს ბურჟუაზია.

და ეს იქნება არა ბურჟუაზიული იდეალი, არამედ ბურჟუაზიული პოლიტიკა საქართველოსი.

ა—ი.

## სომეხ-ქართველთა ურთიერთობა \*)

ბურჟუაზია თავისი დანიშნულებით, თავისი საბოლოო იდეალებით არ არის მოწოდებული ეროვნული იდეალის მატარებლად. ბურჟუაზია, როგორც ასეთი, მხოლოდ იმდენადაა ეროვნული, ეროვნული ინტერესები მას, როგორც კლასს, მხოლოდ იმდენად იზიდავს, რამდენადაც, ეს ერი მის ინტერესებისათვის გამოდგება, მაგრამ არის ხოლმე ისეთი მომენტები, როდესაც იგი დაინტერესებულია თავისი ერის ღონეში, კეთილდღეობაში. ეს უმეტეს ნაწილად მაშინ ხდება, როდესაც ბურჟუაზია ჯერ კიდევ ახალგაზრდაა, როდესაც მას არ ძალუძს მარტომ გააფართოვოს თავისი მოქმედების ფარგალი, როდესაც მისი ნაბიჯები ჯერ კიდევ გაუბედავია და სანადიროდ გასვლას შორს ვერა ჰბედავს; იგი უფრო შინაობაში, შინაურ ბაზარზე ასაღებს თავის ნაწარმოებს, აქ გამოდის სამოქმედოთ.

სომხის ბურჟუაზია, თუმცა იგი ქართულ ბურჟუაზიაზე გაცილებით ძლიერია, მაგრამ ეს ჯერ კიდევ არ მოასწავებს მისს ძლიერებას ობიექტიურად, იგი ჯერ კიდევ არ მისულა იმ წერტილამდე, როდესაც მისთვის სულერთი იქნება სად მოუხდება წარმოება, ვის ერს გაფუქვნის. იგი ჯერ კიდევ დაინტერესებულია, (და მით უფრო დაინტერესებულია, რამდენადაც ქართველი ერი ეჩვევა თავისი ინტერესების შეგნებას და დაც-

\*) იხ. „კლდე“ № 7.

ვას). რომ მისი პოზიცია ყოველმხრით გამაგრებული იყოს; იგი დაინტერესებულია თავის კაპიტალის დასაყრდნობად მშობლიური ნიადაგი ჰქონდეს; იგი დაინტერესებულია თავის მშობრადი კაპიტალი, ერთი მხრით, დედამიწაზედაც მტკიცედ ეყრდნობოდეს, იგი დაინტერესებულია, ასე თუ ისე, არსებობდეს განსაზღვრული ტერიტორია, მისი ერთი დასახლებული, რომ ჰყავდეს განსაზღვრული მომხმარებელი ელიმენტი, და აი აქ ერთდება სომხის ბურჟუაზიისა და სომხის დემოკრატიის, გლეხობის გზები. სომხის გლეხობას, მიწად მოქმედ კლასს, რომელიც საქართველოს ტერიტორიაზე მოდის ასე შეუჩერებლივ, ესაჭიროება მიწა, მეორე მხრით, როგორც დავინახე, ბურჟუაზიაც დაინტერესებულია ტერიტორიის შექმნაში და, მაშასადამე იგი ამ მხრით ნაციონალურ ინტერესებს ემსახურება, როდესაც ასე დაჟინებით იძენს ჩვენს მიწებს. \*)

როდესაც რომელიმე ერი ითქვიფება სხვა ერთში, ჰკარგავს თავის სახეს, ეს შეიძლება მოხდეს ან მისი კულტურული სისუსტით მეორესთან შედარებით, ან მცირედი რიცხვით, რომ მტერის სიმრავლეში ჩაიხრჩოს, და ან ერთმა ერმა მეორე ცეცხლითა და მახვილით გაანადგუროს. ახლობელ პერსპექტივაში არა სჩანს თოფ-იარაღით ჩვენს წინააღმდეგ მტერი და ამ მხრით საფრთხე არ მოგველის, მაგრამ ჩვენ რიცხვით იმდენად უმნიშვნელონი ვართ, რომ თუ მეზობელ მეტოქე ერთა კულტურულ ძალას ჩვენი კულტურული ძალა არ ამოუყენეთ და ბრძოლის ველზე იმავე კულტურული იარაღით აღჭურვილნი არ გამოვედით, ჩვენი ეროვნული საქმე უკუღმა დაიწყებს სვლას.

როგორც ზემოთაც მოვიხსენიეთ, სომხობა არ

\*) ბურჟუაზია სშირად, აღმართავს ხელმე დროსს და სათვალთმაცხოვრად „ეროვნულ ინტერესებს“ დაწერს, მაგრამ ჯერ კიდევ მე-70-ე წლებში მიხეილავსკის შეურეკველ სოციალდემოკრატ კანონად მიანდა, რომ ვინც ემსახურება „საერთოდ“ ეროვნულ, ნაციონალურ ინტერესებს, იგი ემსახურება ეროვნულ ზიანმიდის ზედა ნაწილს ერის უმრავლესობის წინააღმდეგ და მსოფლიდ ის არის ნამდვილი ეროვნული ინტერესების დამცველი, რომელიც „ერის მშრომელი ხალხის“ ინტერესებს ემსახურება. ეს ხომ ასეა და ჩვენ კიდევ ვამბობთ, რომ „სომხის გლეხობისა და სომხის ბურჟუაზიის“ ინტერესები ამ განსაზღვრულ მომენტში შემოხვევით ერთდება.

გაითქვიფა ქართველობაში, რადგანაც იგი საკმაოდ კულტუროსანი ერია, რომ თავისი სახე შეიგრძნოს და თავისი ერი თანდათან გააძლიეროს, მაგრამ კულტურას და ისიც უცხო ნიადაგზე, არა თუ ვერ შექმნის, ვერც შეინახავს არსებულსაც მცირე რიცხვითი ჯგუფი, მაგალითად, სომხის ბურჟუაზია და აუცილებლად საქიროა მათთვის გამრავლება. თუ ფიზიოლოგიური გამრავლება ერთიანად არ არის მათ ხელში, პოლიტიკური ზომები ხომ მათ ხელშია და ეკონომიური ძალაც მოექცევთ და აი კიდევაც, დღითი დღე იზრდება ქართულ ტერიტორიაზე სომეხთა ახალშენები. სომხის ბურჟუაზია, რომ ამ საქმეს მარტოდ-მარტო აწარმოებდეს, მარტო სომხის ბურჟუაზია რომ იყოს დაინტერესებული ნაციონალურ ტერიტორიის შექმნაში, ეს პოლიტიკა სომხის გლეხობისთვისაც რომ არ იყოს სასარგებლო და მაშასადამე სასურველი, რომ მასაც არ უნდოდეს მიწა, მაშინ მანთაშოვების პოლიტიკა, მათი მიწის მფლობელობა სრულიადაც არ იქნებოდა ქართველებისათვის ასე სახიფათო. მართლაც, მანთაშოვები თავიანთ მიწებს ჯიბეში ხომ არ ჩაიდებენ, ან ოსმალეთში ხომ ვერ გაგზავნიან?! ბურჟუაზიას არ უყვარს „მკვდარი კაპიტალი“, იგი ამ მიწას უთუოდ დაამუშავებდა; რომ დანახარჯი აენახლაურებო, იძულებული იქნებოდა ინტენსიური მეურნეობა ეწარმოებინა და ქართულ ტერიტორიაზე სომხის და თუნდ სხვა ერის (სოფლის) მუშა რომ არ ყოფილიყო, ისევე ეს ქართველი გლეხი მოიკალათებდა ამ მიწაზე, ან როგორც მოიჯარადრე, ან როგორც სოფლის მუშა და ისარგებლებდა იმდენად რამდენადაც შეუძლიან ისარგებლოს მიწის მუშა ამ კაპიტალისტურ წესწყობილებაში, კერძო საკუთრების სამეფოში, როდესაც თითონ მოკლებულია ამ საკუთრებას. მაშინ კიდევ ბრძოლა მხოლოდ ერთ ფრონტზე იქნებოდა ე. ი. ორი კლასი დაუპირდაპირდებოდა ერთმანეთს: ბურჟუაზია, ან ლატიფუნდიების პატრონი ერთი მხრით და მუშა, მშრომელი ხალხი მეორეს მხრით, მაგრამ ახლა ამ განწყობილებას ეროვნული ელფერიც ეძლევა და ორი ერის დემოკრატია, გლეხობა, მიწის მომუშავენი დგანან მოწინააღმდეგე ბანაკებში.

ადამიანთა საზოგადოებაში ბრძოლა არსებობისათვის არ სწარმოებს ისეთივე თავდაუქერელი და შეუმცნებელ - აუცილებელი თავგანწირვით, როგორც სხვა ცხოველთა საზოგადოებაში. მართალია, ეს ბრძოლა აქაც არსებობს, მაგრამ მას ასუსტებს

და ეთიკის სხივებით აფერადებს ადამიანში ჩანერგილი გრძნობა სოლიდარობისა, რომელიც თანაგრძნობის სარგებლობის (сочувственный опыт) შეგნებით გამტკიცებულია. თუ საზოგადოებრივი განვითარებაში, თუ ინდივიდი საზოგადოებაში იძულებულია აუცილებელ, გარდუვალ კანონთა გრეხილს დაექვემდებაროს, თუ ადამიანმა, ინდივიდმა იცის რას ნიშნავს „რეალური შემოძლიან“, მან აგრედვე იცის, როგორც მოაზროვნე პიროვნებამ, როგორც ეთიკურმა ღირებულებამ, თუ ითქმის აგრე, თავისი „რევოლუციონური მინდაც“. იგი თავისი ადამიანური სურვილებით იჭრება ამ „გარდუვალ“ კანონთა მსვლელობაში და სცილიობს ისე მიზართოს, როგორც მასა ჰსურს. თუ არსებობს სამკვდრო-სასიცოცხლო ბრძოლა ყოველ არსთა შორის, სადაც ერთმანეთს არა ზოგავენ, ადამიანი აცხადებს: არა, არა მსურს ჩემი მსგავსის, ჩემი თანტოლი ადამიანის სისხლი ვლვარო და მის უბედურებაზე ჩემი ბედნიერება აღვაშენო. არა, მეგობარო, მომეცი ხელი და ერთად ვიმოქმედოთო და სხ. და სხ. ეს არის საიდევლო წეს-წყობილება, ეს არის ადამიანის საოცნებო დრო, როდესაც ადამიანთა საზოგადოებაში, თუ სრულიად არ შესცვლის, ცოტათი მაინც შეამსუბუქებს იდეა სოლიდარობისა ცხოვრების ბრძოლაში შეუბრალებლობას. რაც დრო გავა და ადამიანი განვითარდება, რაც კაცობრიობა უფრო და უფრო დაუახლოვდება ერთა შორის სოლიდარობას, მით უფრო დაჰკარგავს კაცთა შორის და ერთა შორის ბრძოლა სიმწვავეს, მაგრამ ჯერ-ჯერობით, როდესაც ეს საერთაშორისო ძმობა და სოლიდარობა მხოლოდ შორეული სასურველი იდეალია, სხვა და სხვა ერი სახელმწიფოს, თუ უფრო ვიწრო პოლიტიკური ერთეულის სახით ერთმანეთს ებრძვის და ამ ბრძოლაში ხშირად ილახება თვით საზრთლიანობაც. ლოზუნგი საზოგადოებრივობისა, რასაკვირველია, ეს არის: „ყველა ერთისათვის—ერთი ყველასათვის“-ო, მაგრამ ჯერ-ჯერობით კიდევ იმ საფეხურზე ვართ, როდესაც საკუთარი არსებობა, საკუთარი ერი, საკუთარი სიცოცხლე დგას პირველ ადგილზე. შეიძლება პიროვნებისათვის გამირობაც იყოს სხვას შეეწიროს და „საერთოს“ სამსხვერპლოზე დაიწვას, მაგრამ მთელს ერს ამ გამირობას ვერ მოვთხოვთ. როგორც არსებობს უკიდურესი ინდივიდუალიზმი პიროვნების შესახებ, აგრედვე არსებობს, ასე ვსთქვათ, ეროვნული ინდივიდუალიზმიც, ერი თვით—მიზანია და ვერავის ვერ შეეწირება, იგი შეუძლებელია „საშუალე-

ბა“ გახდეს, რომელიმე უფრო დიდ ღირებულებისათვის, რადგანაც ერი ერისათვის თვით არის უდიდესი ღირებულობა.

ახლა, ამ რამოდენიმე საზოგადო მოსაზრებათა შემდეგ ვნახოთ, რამდენად შესაძლებელია ქართველი ერისა და მის მეზობლების ურთიერთობაში ადგილი ჰქონდეს ერთა შორის სოლიდარობის იდეას. რა ინტერესთა წინააღმდეგობა არსებობს ამ ერთა შორის და რამდენად შეუძლიანთ ერთმანეთს დაუთმონ.

შემოთ ჩვენ დავინახეთ რა პოლიტიკას ადგას სომხის ბურჟუაზია და რამდენად სასურველია ეს პოლიტიკა (ეს ახალშენთა პოლიტიკა) სომხის დემოკრატიისათვის. მართალია, ბურჟუაზია ამას უნაგაროდ არ სჩადის და მხოლოდღა ეროვნული ინტერესებისათვის არ იღწვის, იგი იმდენადა სდგას ეროვნულ ნიადაგზე, რამდენადაც შემდეგ ეს „თავისი დემოკრატია“ საწუწნელად გამოადგება, მაგრამ ეს ჩვენ არ შეგვეხება. ჩვენ ამ ჟამად თვით სინამდვილე გვინტერესებს და არა ის, თუ რამდენად სასარგებლოა სომხის ერისათვის ეს პოლიტიკა. ჩვენი აზრით, თუ ჩვენი რჩევა უნდათ, ფუქია სომხობის ცდაა კავკასიაში სომხეთის ეროვნული ტერიტორიის შექმნის და მისი შენარჩუნებისა, რადგანაც ის აქლემი, რომელიც ახლა ქართველი ერის წინ არის დაჩოქილი, იმათ წინაც დაიჩოქებს, როდესაც კურსი გამოიცვლება, მაგრამ ეს სხვა საკითხია, ეს სომხების შეგნებას და შეუგნებლობას შეეხება. ჩვენ ვურჩევდით სომხობას ეს სასიქადულო ენერჯია, ეს ახალშენთა პოლიტიკა, სადმე სხვაგან ეწარმოებიათ, სადაც ისინი მკვიდრად არიან, მაგრამ ეს არა მკითხეს რჩევაა. უთუოდ იმათ უკეთ იციან, სად რა პოლიტიკა სჯობია, რახან აგრე სცილიობენ. სინამდვილე კი ის არის, რომ ქართველი შეუგნებელი თავად-აზნაურობა უსირცხვილოდ ჰყიდის მამა-პაპათა სისხლით გაპოზიერებულს მიწას, სომხობა (დიად, სომხის ბურჟუაზია—სომხის გლეხობისათვის) კი მას გაჩქარებული ჰყიდულობს და ქართველი გლეხი კი ბოგანოდება, და როდესაც შეგნებული ქართველი, **ან მთელი ჯგუფი ან თუნდა რომელიმე პოლიტიკური პარტია წინააღმდეგება ამ პროცესს (ტერიტორიის ყიდვა-გაყიდვას) იგი ძალაუვნებურად ერთი მხრით ქართულ ეროვნულ ინტერესებს ემსახურება და მეორე მხრით კიდევ სომხის ბურჟუაზიის წინააღმდეგ იბრძვის.** სომხის ბურჟუაზიის აღნიშნული პოლიტიკა სომხის ეროვნული ინტერესების სამსახურია ამ ჟამად

და სომხის დემოკრატია, თუ იგი ამავე დროს ეროვნულ ნიადაგზე სდგას, ამ პოლიტიკის მომხრეა და მასთანადამე, ის ქართველი, რომელიც სომხის ბურჟუაზიის წინააღმდეგ იბრძვის, ამ გზაზე უთუოდ სომხის დემოკრატსაც შეხვდება. ამ დასკვნამდი მიგვიყვანს ლოდიკური მსჯელობა.

ამ ჟამად როგორც ჩვენს დემოკრატიულ ინტელიგენციაში, აგრედვე სომხებისაში დიდ პატივშია იდეა სოლიდარობისა, შეთანხმებისა და ორივე მხარეს სწამს ხშირად გულწრფელად ამის შესაძლებლობა როდესაც ქართული დემოკრატია სომხის ბურჟუაზიის მხრით ერთობ ეგოისტურ მოქმედებას დაინახავს, ამის ბრალს მხოლოდ ამ „ბურჟუაზიას“, „სოლოლაკელებს“ მიაწერს და სომხის დემოკრატსაც ეთანხმება და გულსწყრომით იხსენიებს ბურჟუაზიას. ვინც კვალ და კვალ მისდევდა ჩვენს მსჯელობას, უნდა დაგვეთანხმოს, რომ ორივე ერის დემოკრატია, ან გულუბრყვილოდ ტყუვდება და ან თვალთმაქცობს. ვნახოთ!

რას ამბობენ ჩვენი სოციალისტური პარტიები? რაც შეეხება ს.-დემოკრ., ერთობ ცხადია და მარტივი მათი შეხედულება ამის შესახებ, როგორც საერთოდ მთელი მათი სოფლმხედველობა. როგორც თვით ეროვნული საკითხი მხოლოდ ბურჟუაზიის მიერ, კლასობრივ ბრძოლის დასაჩრდილავად მოგონილ საკითხად მიაჩნიათ, აგრედვე სოლიდარობისთვის დაღადი ისევ ბურჟუაზიის ოინებად მიაჩნიათ და ყველა ერთა დემოკრატის იგი სულ სხვა ნიადაგზე ჰპირდება შეკავშირებას. როგორც პროლეტარიატის პარტია, როგორც კოსმოპოლიტურ იდეალების აღმსარებელი და ქომაგი მთელი ქვეყნიერების პროლეტარათა“ განუჩევილად რასისა, კუთხისა, მოდგმისა, იმისთვის სულერთია ვის ნიადაგზე, ვის პროლეტარიატს, რა ტომის მუშა ხალხს დაიცავს იგი. მისი იდეალია უნივერსალი სახელმწიფო, ერთი მთელი ერთეული—კაცობრიობა, რომელსაც არა ჰყოფს არც მოდგმა და არც გეოგრაფიული საზღვრები; რომელმაც არ იცის რაა „ჩემი სახელმწიფო“, „ჩემი ერი“, „ჩემი ტერიტორია“, არამედ ერთი უნივერსალი დემოკრატიული სახელმწიფო და მისი შემადგენელი ნაწილი, უნივერსალი მოქალაქე. მასთანადამე ს.-დემოკრატია ვერ იქნება დაინტერესებული იმაში, რომ ქართველ ერს შერჩეს საკუთარი ტერიტორია, რადგანაც მას არ აინტერესებს და საჭიროდაც არ მიაჩნია თვით ქართველი ერის არსებობაც კი. დღევანდელ სინამდვილეს იგი მომავალი შორეული იდეალის თვალთ უყურებს და, სრულიად

ლოდიკურად შესაძლებლად და მასთანადამე სასურველად მიაჩნია ამ ორ ერთა დემოკრატიის სოლიდარობა. ს.-დემოკრატიული თვალსაზრისით არც არსებობს ზემოაღნიშნულ ინტერესთა კოლიზიამისთვის სულ ერთია ამ განსაზღვრულ ტერიტორი, ანუ ქართველი ხალხი იქნება თუ სომეხი, რადგანაც ბოლოს ისიც გაქრება და ისიც, როგორც ერი და ასე უსახოდ შევა უნივერსალურ შრომის სამეფოში. სრული ანალოგიაა ს.-დემოკრატიულ მსოფლმხედველობაში ამ საკითხზე და გლვებთა საკითხზე შემუშავებულ აზრებში; მისთვის თუ არსებობს გლვებთა ინტერესები, მხოლოდ იმდენად, რამდენადაც ეს გლვები მომავალი პროლეტარია; და ერიც იმდენად, რამდენად სომეხი და ქართველი მომავალი უნივერსალი მოქალაქეა—უგვარო და უტომო. ს.-დემოკრატს არ აქვს ეროვნება (ქვეით დაინახავთ რომ ყოველივე ეს მხოლოდ ქართველ ს.-დემოკრატიაზე თუ ითქმის, რომელიც წარმოადგენს: plus roialiste que le roi lui même). ქართველი ს.-დემოკრატი ხომ ქართველი არ არის; ერთს მათს ლიდერს ჰკითხეს უცნობ საზოგადოებაში, რა ეროვნებისა ხართო და მან ამაყად უპასუხა ს.-დემოკრატი ვარო (si non e vero e ben trovato). შეიძლება მიპასუხობთ: ს.-დემოკრატია კლასებსაც დროებით რეალობადა სთვლის, ისიც მას გარდამავლად მიაჩნია, მაგრამ მაინც კლასობრივ ნიადაგზე სდგას და ერთი განსაზღვრული კლასის ინტერესებს იცავსო. მაგრამ საქმეც ის არის, რომ მას ეროვნებაც გარდამავალ ფაქტად მიაჩნია და კლასს იგი ექომაგება, როგორც ასეთს, იმიტომ რომ იგი საშუალებაა იმ უნივერსალ დემოკრატიულ სახელმწიფოს დასამკვიდრებლად, ამას კი ვერ შეასრულებენ ეროვნებანი. ვისაც ეროვნებაც ისეთ დროულ და გარდამავალ მოვლენად მიაჩნია, როგორც წოდებანი და კლასები, ვერც იბრუნებს მისი განმტკიცებისათვის. თვით ძირითადი დებულებანი ს.-დემოკრატიული მოძღვრებისა, რომ არ მიგვაჩნდეს ჩვენ შემცდარად, შემდეგი მათი მსჯელობა სწორი ლოდიკური მსჯელობაა; თუ მივიღეთ მისი ძირითადი დებულებანი, ჩვენ ლოდიკა გვაიძულებს სწორედ მათ დასკვნას დავეთანხმობთ.

სულ სხვა გვარია სოც.-ფედერალისტთა შეხედულება. სულ სხვა დასკვნამდე მივდივართ, თუ ს.-ფედერალისტთა მსოფლმხედველობას გავიზიარებთ. ს.-ფედერალიზმს სწამს, რომ ერი გადუვალი ფაქტია. კაცთა შორის ძმობა, ერთობა, სოლიდარობა ეს ს.-ფედერალისტთათვისაც იდეალია, მაგრამ ამ

კაცობრიობის ერთს ოჯახში არა თითოეული ინდივიდი შევა შემაღვენელ ნაწილად, არამედ თვით ერი, თავისი განსაკუთრებული სახით, თავისი კულტურით და იქნება თავისუფალი და დამოუკიდებელი ერთეული. კაცობრიობა მათ წარმოდგენაში მშვენიერი რამ, მრავალფეროვანი და თვალწარმტაცი თაიგულია, სხვა და სხვაფერ ეროვნებათაგან საამურად მოქარგული. სოციალისტურ ბედნიერ ქვეყანაში თვით ერნი შედგამენ ფეხსაო, ამბობს იგი შეხედულება და ამნაირად მისთვის სულერთი არ არის გაქრება თუ არა ერი. \*)

**ს. დადიანი.**

(დასასრული იქნება).

**მიწის საკითხი \*\*)**

რეფორმაციას, რომელიც მოახდინა ლიუტერმა, სარწმუნოება ედვა სარჩულად და, მერე, ლიუტერის რეფორმაციის ნიადაგზე აღმოცენდნენ ფანტიკური ბურჟუაზიული სექტები, რომელნიც ცდილობდნენ შეებოქათ საზოგადოება.

მაგალითად ცვინგლი, — რომელიც შეიქმნა სარწმუნოებრივ რეფორმატორად ლიუტერის გავლენით, — იმ აზრისა იყო, რომ სახელმწიფო უნდა გარეოდა სარწმუნოებრივ საქმეებში. მისი მსოფლმხედველობა მოითხოვდა სხვაგვარი რწმენის დევნას, და მისი ცხოვრება საეკლესიო ეთანხმებოდა მის რწმენას. მან წინასწარმეტყველის როლი მიითვისა და ქალაქის საბჭო სარწმუნოებრივ კანონმდებლად გახდა. მაგალითად 1530 წელს საბჭომ გამოსცა ბრძანება, რომ ყოველი მოქალაქე კვირა დღეს უთუოდ მოსულიყო ეკლესიაში და დასწრებოდა წირვას. 1525 წელს კათოლიკეთ აუკრძალეს წირვა. მეორე რეფორმატორმა, კალვინმა, დაუმორ-

ჩილა თავისი სასტიკი სარწმუნოებრივ სისტემას ჟენევა (1536 წლიდან 1555 წლამდის).

1542 წელს მან დააწესა უზუცესთა სამსჯავრო, ანუ კონსისტორია, რომელსაც ყური უნდა ეგდო თვითეული მოქალაქისთვის. ამგვარად, მან შებოქა თვითეული მოქალაქის პირადი ინიციატივა და თავისუფლება. აღკრძალულ იქმნა ყოველივე სამხიარულო გასართობი: სახალხო თამაშობანი, სიმღერები, ცეკვა და სხ. და, ვინც არ ემორჩილებოდა ამ აღკრძალვას, სასტიკად ისჯებოდა.

ამგვარი ხასიათი ჰქონდა რეფორმაციას, რომელიც აღიარეს მოქალაქეებმა და რომელსაც თან ახლდა სარწმუნოებრივი ფანატიზმი.

მაშ სარწმუნოებრივი ფანატიზმი მართო გლეხთა მოძრაობის ნოშნობლივ თვისებას კი არ შეადგენდა, არამედ საზოგადო მოვლენა იყო იმ დროს.

გლეხთა აჯანყება დაიწყო 1525 წლის თებერვალში და თითქმის მთელ გერმანიას მოედვა, მაგრამ აჯანყებულთა მოუშალებლობისა და მოუწყობელობის გამო, მოძრაობა ენკენისთვეში ჩააქრეს.

რა შედეგი მოჰყვებოდა გლეხთა გამარჯვებას? ვფიქრობ, რომ დამყარებოდა ისეთივე ფედერატიული კავშირი რესპუბლიკათა, როგორც იყო შვეიცარიაში, და დღეს ევროპაში დაახლოვებით ისეთივე წესწყობილება იქნებოდა, როგორც არის ჩრდილო-ამერიკის რესპუბლიკაში.

ამასვე ამტკიცებს მეორე დიდი ისტორიული ფაქტი. საფრანგეთის დიდი რევოლუცია ვერ გაიმარჯვებდა, გლახებიც რომ არ ამხედრებულიყვნენ ფეოდალთა წინააღმდეგ.

და, თუ გლეხებს ოდესმე რეაქცია გაუძლიერებიათ, ამის მიზეზად უნდა დავსახოთ მათი შეკავშირების სიძნელე, მაშასადამე, მათი დამორჩილების სიადვილე.

ამიტომ მიწის წვრილ მუშათა გამრავლებას დიდი პოლიტიკური და ეკონომიური მნიშვნელობა აქვს, რადგან მიწის მუშათა სიმრავლე ასაზრდოებს ვაჭრობასა და მრეწველობას, ჰქმნის შინაურ ბაზარს და ხელს უწყობს დემოკრატიული წესწყობილების განმტკიცებას. შეჰქენით ისეთი ეკონომიურად ღონიერი გლეხობა, როგორც არის ჩრდილო-ამერიკის შტატებში და თქვენ შეიქმთ, იმავე დროს, ამერიკის განვითარებულს ეკონომიურსა და პოლიტიკურ ცხოვრებას.

უნდა აღვიაროთ თუ არა დღევანდელი კერძო საკუთრება, როგორც საუკუნო, უცვლელი სახე აგრარული ურთიერთობისა? ვფიქრობ, რომ არა.

\*) ოტტო ბაუერის შეხედულება ამ უკანასკნელ შეხედულებას უფრო უსწავდებებს ვიდრე პირველს, რომელსაც იგი „გულუბრუვილო კოსმონომიტიზმს“ უწოდებს, მაგრამ იგი ვერა სთრგუნსავს საბოლოოდ იმ ტენდენციას, რომლის მიხედვით თიხის საჭინო იყოს უგულვანო ერანებათა გაქრება „ერთი ეროვნების შესდენა“ დ. გვ. 170.

\*\*) იხ. „ქედე“ № 6 და 7.

ცხოვრება წინ მიდის და საერთო განვითარებას, ევოლიუციას, ვერც კერძო საკუთრება ასცდება.

წვრილი მიწის მუშები აარსებენ საერთო ღვინის სარდაფებს, პურის საწყობებს, აბრეშუმისა, ყველისა, მატყლისა და სხ. საკეთებელ ქარხნებსა, საკრედიტო ამხანაგობათა, საერთო სავაჭრო ამხანაგობათ და სხ. გლეხი თავს ითავისუფლებს ბარბაროსობიდან და ახალის, დაწინაურებული წარმოებისა და ცხოვრების მოწინავე ხდება. ამხანაგობა, კავშირი აუცილებელი შეიქმნა.

და, ვინ იცის, როდის და რა ბოლო ექნება ამ ახალი წარმოების წესს? შეიძლება არასოდეს არ განხორციელდეს სოციალიზმი იმ სახით, როგორც ფიქრობენ სოციალისტები, და შორეულმა სანატრელმა ეკონომიურმა წესწყობილებამ არ უარპყოს სავესებით კერძო საკუთრება. შეიძლება მომავალმა საზოგადოებამ ძლიერ შეამკიროს მხოლოდ ის მაქსიმუმი მიწისა, რომელიც ეჭიროს ხელში ერთ მე-საკუთრეს. მაშინ კი მიწა ალბად ყველას ექნება, მაგრამ არც კერძო საკუთრება იქნება უარყოფილი და არც ეკონომიური თანასწორობა იქნება განხორციელებული. მაშასადამე კვლავ დარჩება კერძო საკუთრება, მაგრამ შეცვლილი, შეზღუდული.

მეორე მხრით ვერც არავინ იმას იტყვის, რომ კერძო საკუთრება არასოდეს არ მოისპობაო. შეიძლება ოდესმე კომუნამ დაიჭიროს კერძო მესაკუთრის ადგილი, მაგრამ, ცხადია, სრული ეკონომიური თანასწორობა კომუნათა შორის არც მაშინ იქნება.

ბოლოს, შეიძლება, ევოლიუციამ იქამდის მი-აღწიოს, რომ მთელი ერი ერთ ოჯახად გარდაიქმნეს.

მაგრამ, დაწვრილებით არავის არ შეუძლია სთქვას წინ და წინ, როგორი წესი დამყარდება შორეულ მომავალში. ეს პლანები და პროგრამები შორეულ ეკონომიური ურთიერთობისა მეცნიერულ საფუძველს კი არ ემყარებიან, არამედ უფრო პირადს, სუბიექტიურ სურვილებს, ნატვრას.

მხოლოდ ერთი რამე შეიძლება აღვიაროთ წინდაწინვე. ეკონომიური ევოლიუცია უარპყოფს ყველაფერს, რაც ეწინააღმდეგება მწარმოებელის პირად სარგებლობას.

და ამ მხრით კომუნა უფრო შესაძლებელი, ადვილად განსახორციელებელი და სასარგებლო იქნება, ვიდრე მიწის სოციალიზაცია. კომუნა ერთი დიდი ოჯახია. თვითეული წევრის სარგებლობა სავსებით ეთანხმება სხვა წევრთა სარგებლობას, რო-

დესაც კი თანასწორობაა წევრთა შორის, და თვითეული წევრი დარწმუნებულია, რომ, თუ კომუნის საქმეები კარგად მოეწყობა, მისი შთამომავლობაც უზრუნველყოფილი იქნება. მაშასადამე, ამ მხრით კომუნა ძლიერ ჰგავს კერძო მესაკუთრეს და იმავე დროს ძლიერ განსხვავდება მიწის სოციალიზაციისაგან. და სწორედ ამ მიზეზს მიეწერება, რომ ჩრდილო-ამერიკის რესპუბლიკაში მშვენიერად მი-დის ბევრი ამგვარი კომუნის საქმე, როგორც აღნიშნავს ანციფეროვი თავის თხზულებაში კოოპერაციათა შესახებ.

მაგრამ არიან ისეთებიც, რომელთაც სწამთ სავესებით სოციალისტური ორგანიზაცია და უარპყოფენ კერძო საკუთრებას შორეულ წესწყობილებაში.

აქვთ თუ არა ამგვარ სოციალისტებს რამე საერთო ნაციონალ-დემოკრატიასთან? ცხადია, რომ ისინი არსებითად არ განსხვავდებიან ნაციონალ-დემოკრატებისაგან. რატომ? იმიტომ, რომ მათი სოციალიზმი შორეულ მომავალს შეეხება და არა აწმყოს, ამ დროს. დღეს კი ისინი პირწმინდა ნაციონალ-დემოკრატები არიან. ისინი უარპყოფენ დღეს სოციალიზმის განხორციელების შესაძლებლობას, მათთვის სოციალიზმი არ წარმოადგენს პრაქტიკული ეკონომიური პოლიტიკის საგანს. მაშასადამე, ისინი დღეს, შეიძლება ითქვას, არ არიან სოციალისტები, კიდევაც რომ სოციალისტებად აღიარებდნენ თავის თავსა.

მეორე მხრით ნაციონალ-დემოკრატები, რომელნიც უარპყოფენ სრულიად სოციალიზმს, არ უარპყოფენ კოოპერაციებს, ამხანაგობათ, კერძო მესაკუთრეთა ეკონომიურ შეერთებას, რადგან ერთობა ჰქმნის ეკონომიურ პროგრესს, სიმდიდრეს. და ამ ნიადაგზე ნაციონალ-დემოკრატი და ის, ვისთვისაც სოციალიზმი მხოლოდ შორეულ იდეალს წარმოადგენს, ერთად არიან. ცხადია, ეს უკანასკნელი ნაციონალ-დემოკრატი უფროა, ვიდრე სოციალისტი. და დიდი შეცდომა იქნება, რომ ნაციონალ-დემოკრატმა ხელი ჰკრას მას მხოლოდ იმიტომ, რომ ის აღიარებს სოციალიზმს, როგორც შორეულ იდეალს.

მხოლოდ იმას არ შეგვიძლია ვუწოდოთ ნაციონალ დემოკრატი, ვინც ფიქრობს, რომ დღესვე შეიძლება სოციალიზმის განხორციელებაო, ან ვინც აღიარებს მიწის სოციალიზაციას ნაციონალიზაციას ან მუნიციპალიზაციას, როგორც მახლობელს ეკონომიურ იდეალს, რადგანაც მისი პრაქტიკული



მოქმდება და ტაქტიკა უარყოფს პრინციპიალურად წერილ კერძო მიწის მუშათა გამრავლებასა და ეკონომიურ გაღონიერებას, თუმცა პრაქტიკულად ხშირად არის იძულებული უღალატოს თავის პრინციპს.

მაგრამ რა დამოკიდებულება უნდა დაიკვიროს ნაციონალ-დემოკრატიამ სოციალისტურ პარტიებთან? ყოველთვის და ყველაფერში უნდა გადაეღობოს მათ? სრულიადაც არა. სადაც სხვა და სხვა დემოკრატიულ პარტიებს ერთი გზა აქვთ, იქ ერთად მოქმედებაა საჭირო.

და დიდ უბედურებად უნდა ჩავთვალოთ ის უკიდურესი ფანატიზმი, რომელმაც გაიკვლია გზა ჩვენში პარტიებს შორის. ერთმანეთის სიძულვილი, მოპირდაპირის აზრის აუტანლობა, მარტო საკუთარი რწმენის აღსარება, ერთადერთ ქეშმარიტებად აღიარება და პარტიული ფანატიზმი, რასაც ადგილი ჰქონდა ამ უკანასკნელ დროს ჩვენში, საშუალო საუკუნეებს მოგვაკონებს და ჩვენს გონებრივ განუვითარებლობას მოასწავებს.

ვერიდოთ ფანატიზმს, რომელსაც არასოდეს და არსად კარგი არა დაუთესია-რა!

როგორი უნდა იყოს ჩვენი პრაქტიკული პოლიტიკა? რუსეთში რომ ოდესმე საკანონმდებლო ორგანო მნიშვნელობას მოიპოვებდეს და რუსეთის კონსტიტუციონალ-დემოკრატიების საადგილ-მამულო პროგრამა განხორციელდებოდეს, ჩვენი ნატვრა აღრე ასრულდებოდა. კადეტებს უნდათ, რომ დიდ მემამულეს მამულის მხოლოდ განსაზღვრული რაოდენობა შერჩეს ხელში, ზედმეტი კი სახელმწიფომ იყიდოს და გადასცეს გლეხებს. ამგვარი გამოსყიდვა იძულებითი უნდა იყოს, მაგრამ მემამულეს მამულის სამართლიანი, ნადმილი ფასი უნდა მიეზღოს. ამგვარად მოისპობა დიდი მამულები, ეგრეწოდებულ ლატიფუნდიები, და შეიქმნება ეკონომიურად ღონიერი გლეხობა.

რაც შეეხება მიწის სათემო მფლობელობას, ამის შესახებ კადეტთა შორის არ არის სრული თანხმობა: ზოგი კერძო საკუთრებას აღიარებს, უმეტესობა კი სათემოს.

ჩვენში კი, რასაკვირველია, დღეს შეუძლებელია ლაპარაკი სათემო მფლობელობაზე, ე. ი. ბაღოსობა და მევენახეობა უდევს საფუძვლად მეურნეობას.

რატომ არ უნდა იყოს სათემოდ, მაგალითად, ტყე? იმიტომ, რომ სათემო ტყის დაცვა შეუძლებელია: თვითეული წევრი თემისა ცდილობს, რაც

შეიძლება, მეტი მოსჭრას, და, როდესაც ტყე კერძო საკუთრებას შეადგენს, პატრონი იცავს, ინახავს. ტყის შენახვას კი უდიდესი სამეურნეო და კლიმატოლოგიური მნიშვნელობა აქვს.

რატომ არ უნდა იყოს საძოვარი სათემოდ? ის საძოვარი, სადაც შეიძლება ბალახის თესვა, ინტენსიური მეურნეობა, სჯობს იყოს კერძო საკუთრებად, რადგან სათემო მფლობელობა ხელს უშლის ინტენსიურ წარმოებას: ერთი რომ მოინდომებს გაუმჯობესებას, მეორე არ მოინდომებს ან ვერ შესძლებს მხარი დაუჭიროს პირველს.

ის საძოვრები კი—მაგალითად, მთებში ან დიდს ურწყავ მინდვრებზე, რომელთა გაყოფაც შეუძლებელია, უნდა დარჩეს სათემო მფლობელობაში.

მაგრამ ეს კი უნდა აღვიაროთ: ლატიფუნდიები არასოდეს არ ყოფილა სასარგებლო. პირიქით, როდესაც მცირეოდენ ჯგუფს ჩაუგდია ხელში მთელი მიწა-წყალი, მაშინ ქვეყნის მეტი წილი დაუშუშავებელი დარჩენილა, მიწის მუშათა უმეტესობა ღარიბია და არ წარმოადგენს საკმაო შინაურ ბაზარს, და, ამიტომ ვაჭრობა და მრეწველობა განუვითარებელია.

ახლა ვიკითხოთ: რა პოლიტიკა უნდა ვაწარმოოთ ჩვენში.

სათათბიროში ჩვენმა დებუტატმა უნდა დაიცვას კერძო საკუთრება მამულზე და დაუჭიროს მხარი მამულების გამოსყიდვას დიდ მემამულეთაგან იმ პირობით კი, რომ ეს მამულები გადაეცეს მცირე ფასად ქართველ გლეხებს.

მაგრამ ეს მხოლოდ შორეული პოლიტიკა იქნება და, ვინ იცის, მოიპოვებს თუ არა სათათბირო ისეთს უფლებას, რომ მისი ნება კანონად შეიქმნეს, და, თუ ჩვენ ამ კანონმდებლობასაც შევეცეთ, იმიტომ, რომ საჭიროა ნათელგყოთ ჩვენი პრინციპიალური შეხედულება ამ საკითხზე, და, როგორც ვთქვით, ამ პრინციპის დედა აზრი ეს არის: ჩვენ უარყოფთ მამულების უსასყიდლოდ ჩამორთმევას, რადგან ეს გამოიწვევდა საერთო ეკონომიურ კრიზისსა და არეულობას, რომელიც შობდა, როგორც მიზეზი შედეგს, საშინელ რეაქციას.

როგორი-ღა უნდა იყოს ჩვენი დღევანდელი აგრარული პოლიტიკა?

ფექტობ, რომ მხოლოდ კრედიტს შეუძლია განხორციელოს ხსენებული მიზანი, რადგან ახლანდელ დროში უკრედიტოდ არა კეთდება-რა. და ამ აზრის დასამტკიცებლად კვლავ დავიმოწმებ

პოზნანის საპერტოვოს, სადაც საგლეხო საადგილ-  
მამულო ბანკებმა იხსნეს პოლონელნი ტერიტორი-  
ის დაკარგვისაგან. (იხ. ამის შესახებ „ბერნგარდ-  
ტის“ კეთილსინდისიერი გამოკვლევა: „ბრძოლა  
პოლონელთა არსებობისათვის პრუსიაში.“).

და ჩვენც შეგვეძლო მოგვეხმარა ამ მიზნისათ-  
ვის ეგრედ წოდებული საგლეხო გამოსაკვები თან-  
ხა, რომელიც შეადგენს ქართველი გლეხების სა-  
კუთრებას. არ ვიცი, რისთვის ახდენიან ადმინის-  
ტრაცია ყოველ წელს გლეხებს ამ გადასახადს, თუ  
კი ამ თანხის დანიშნულება ის არ არის, რომ  
გლეხებსვე დაეხმაროს.

გავიმეორებ, ამ თანხით რომ ქართული  
საგლეხო ბანკი დაარსდეს, ამას უდიდესი მნიშვნე-  
ლობა ექნება აგრარული საკითხის სასურველად გა-  
დაწყვეტისათვის.

რუსეთის გლეხებს თუ კი ეხმარებიან სახელ-  
მწიფო საგლეხო ბანკები, უსამართლობა იქნება,  
რომ ქართველ გლეხებს თავისი საკუთარი საგლე-  
ხო ბანკის დაარსების უფლება არ ჰქონდეთ.

ხალხი გამრავლდა. უმამულოთა რიცხვი დლი-  
თი-დღე იზრდება. აი აქ არის სათავე სოციალური  
მოუწესრიგებლობისა. ეკონომიურად დასწეულე-  
ბულ ერს წამალი ეჭირვება. და, როგორცა ვთქვით,  
კრედიტი—ერთი საუკეთესო საშუალებათაგანია.

საგლეხო სახელმწიფო ბანკის განყოფილება  
ჩვენშიაც არის, მაგრამ მისი დანიშნულება სულ  
სხვაა: მაშინ, როდესაც ქართველი გლეხი უმამუ-  
ლობისაგან იძულებულია სპარსეთში გადაიხვეწოს  
მუშად, საქართველოში იმ მამულებზე, ურომლი-  
სოდაც აქაურ მიწის მუშებს სული უნდა ამოხდეთ,  
სხვა გუბერნიებიდან ასახლებენ გლეხებს!

დღე, იყოს ამგვარი ბანკიც: არ უარგყოფთ,  
ეკონომიური ცილობა საჭიროა, მაგრამ, როდესაც  
სახელმწიფო საგლეხო ბანკი სხვა გუბერნიის გლე-  
ხებს უმართავს ხელსა, დიდი უსამართლობა იქნება,  
რომ ქართველ გლეხებსაც იგივე იარაღი არ მია-  
წოდონ.

როგორ, რა გზით შეიძლება ასრულდეს ეს  
დიდი საქმე?

ვფიქრობთ რომ საკანონმდებლო გზით. ჩვენი  
დეპუტატი მოვალეა შეკრიბოს ხსენებული თანხის  
შესახებ საჭირო ცნობები და შეიტანოს სათათბი-  
როში შესაფერი კანონპროექტი. თავისი მხრით  
ჩვენი მარშლები, ბანკირები და სხვა საზოგადო  
მოღვაწენიც მოვალენი არიან იშუამდგომლონ, სა-

დაც ჯერ არს, და აღმოუჩინონ ამ საქმეში ჩვენს  
დეპუტატს ყოველგვარი დახმარება.

და, თუ ამ გზით არ მოხერხდა ამგვარი ბან-  
კის დაარსება, მაშინ უეჭველად სხვა გზა და საშუ-  
ალება უნდა აღმოვაჩინოთ, რადგან უამისოდ სხვა  
დაეპატრონება ჩვენი ერის სისხლითა და ოფლით  
მორწყულ მიწას.

ტყვია.



## ხიზანთა საკითხი

ჩვენი ჟურნალის მეშვიდე ნომერში უკვე იყო  
დაბეჭდილი პირი იმ ტელეგრამისა, რომელიც გა-  
უზგავნეს ქართველ დეპუტატებს ზოგიერთმა სოფ-  
ლელებმა.

ეხლა მოგვყავს პირი იმ წერილებისა, რომ-  
ლებიც გაუზგავნეს იმავე სოფლებმა ქართველ დეპუ-  
ტატებს.

წერილი პირველი.

პირი.

სახელმწიფო სათათბიროს წევრთ ბ-ნ, ბ-ნ ვ.  
ლ. გელოვანს და კ. ს. ჩხეიძეს.

სათათბიროს წევრო!

ჩვენ ფრონის ხეობის ოქონის საზოგადოების  
დროებით ვალდებულ და მკვიდრ გლეხებს სოფ.  
თერეგვის, ახალშენის, ნელლათის, ხუნდის-უბნის,  
თილის, შინდრის, მულრისის, ტყის-უბნის, ნაბა-  
კვის და ოქონის მცხოვრებლებისაგან ამორჩეულნი  
პირნი მოგმართავეთ თქვენ და გიცხადებთ მათ გა-  
ჭირებას: ვინ იცის, რა დროიდან,—ჩვენ მამა-პაპათ  
აქ უცხოვრიათ, სამშობლოს მიდამოები განსაცდელ  
დროს სისხლით მოურწყავთ, ოფლი დაუღვრიათ  
და ჩვენამდის ჩვენი ბატონებისათვის მამული შეუ-  
ნახავთ.

დღეს ჩვენმა მებატონეებმა წაგვართვეს ჩვენი  
ოფლით და სისხლით გაპოხიერებული სახნავი მა-  
მულები და ზედ უცხო მხრიდან გადამთიელნი ჩაგ-  
ვისახლეს. დღემდის თუ თავისუფლად ვსარგებლობ-  
დით, ფართოდ ვთავსდებოდით და გვყოფნიდა სა-  
ძოვრითაც, ტყითაც, დღეს გარშემორტყმული ხიზ-  
ნებით შევიწროვდით და განვიცდით გაჭირებას უმა-  
მულობით.

შევწვიეთ ხიზნების ჩასახლებას, მით რომ

დღემდის ჩვენ არ გვეშლებოდა მათთან ერთად საძოვრით და ბუჩქნარი ტყეებით სარგებლობა.

დღეს, როგორც გვეყურება, სახელმწიფო-სათათბიროში ირჩევა ხიზანთა საკითხი და სხვათაშორის ხიზნების სარგებლობის ქვეშ უნდა გადავიდეს საძოვარი, სათიბი და ბუჩქნარი ტყეები, თუ ეს დაკანონდა, მაშინ ჩვენ ხიზნები აღარ გავგატარებენ ამ ადგილებში, მეორე ბატონები გავგიჩნდებიან და ძალაუფლებურად ჩვენსა და მათ შორის უნდა დაირღვეს კეთილი განწყობილება.

ჩვენ მაშინ აქ აღარ გვეცხოვრება!

აი, ამიტომ, გთხოვთ ხიზანთა საკითხის დროს იქონიოთ მხედველობაში დროებით-ვალდებულ და მკვიდრ გლეხების მდგომარეობა და დასტოვოთ ის ადგილები, რომელნიც უნდა გადავიდეს ხიზნების ხელში—როგორც სასერვიტუტო ადგილები, საერთო სარგებლობაში ხიზნების და დროებით-ვალდებულ გლეხებს შორის, ე. ი., დროებით ვალდებულ და მკვიდრ გლეხებს არ დაუშალონ საძოვარი და ბუჩქნარი ტყეებით სარგებლობა.

ეს წერილი ეკუთნის გორის მაზრის, გომის საბოქაულოს ოქონის საზოგადოების რწმუნებულ პირებს ალექსი ჟღენტს და სოსიკო მესხს, 1914 წ. 12 თებერვალს.

რომელზედაც ხელს ვაწერ: ჩემს მაგიერ და სოსიკა მესხის მაგიერ, რომელმაც წერა არ იცის, ხელს ვაწერ ალექსი ჟღენტი, ვამოწმებ მე ოქონის საზოგადოების სოფლის სასამართლოს მოსამართლე ალექსი ჟღენტის ხელის მოწერას მე ისინი ნინა-შვილი სახელმწიფო ბეჭედის დასმით.



წერილი მეორე.

პირი.

**სახელმწიფო სათათბიროს წევრთ ბ-ნ, ბ-ნ ვ. ლ. გელოვანს და კ. ს. ჩხეიძეს.**

**სათათბიროს წევრნი!**

ჩვენამდის მოაღწია და გვეყურება, რომ ამ უმად სახელმწიფო-სათათბიროში ირჩევა ხიზანთა საკითხი და სხვათაშორის მათ სარგებლობის ქვეშ უნდა გადავიდეს საძოვარი, სათიბი, საწყლიპირო და ბუჩქნარი ტყეები იმ საზღვრებ შიგნით, რომლებითაც ჩვენ და ხიზნები საერთოდ ვსარგებლობდით და, თუ ეს დაკანონდა, მაშინ ჩვენ მეორე ბატონები გავგიჩნდებიან.

ჩვენ მკვიდრნი მცხოვრებნი გლენი, რომელ-

ნიც უამთა-ვითარების შემდეგ ვსარგებლობდით ამ ადგილებით, აქ ჩვენ მამა-პაპათ სისხლი და ოფლი ჩაუღვრიათ, რალაც ოცი და ოცდაათი წლის განმავლობაში ჩვენმა მემამულეებმა ჩავვისახლეს უცხო მხრიდან მოსული ხიზნები, ჩამოგვართვეს სახნავი მამულეებიც და მით უფრო უმამულობისაგან შევივიწროვდით.

შეიზა ჩვენი სოფლის ოქონის, როგორაც საზღვრები—აგრედვე მფლობელობა ხიზნების სოფლების გაშენებით, ერთის მხრივ სოფ. სხლითით და მეორეს მხრით სოფ. გიორგი-წმინდით,—სოფ. ოქონას, ვიდრე ხიზნებს ჩავვისახლებდნენ, ექირა ზომით 1470 დეს. 1700 კ. ს., დასახლების შემდეგ სოფ. სხლითზედ გადავიდა 445 დეს. 1630 კ. ს. და სოფ. გიორგი-წმინდაზედ—385 დეს., მამასადა-მე სოფ. ოქონას დარჩა 646 დეს. 70 კ. ს., რომელიც ჩვენ დროებით-ვალდებულ გლეხებს გვეკუთნის 110 დეს. 1800 კ. ს. ნაღდი, დანარჩენ მამულთ ფლობელობენ ძმ. ფალავანდიშვილები, წვრილი მემამულენი აზნ. ლაშხები, ხიმშიაშვილები და მესაკუთრე გლეხები. ამ ნადელს გარდა ჩვენ 75 მონაწილე დროებით-ვალდებულ გლეხებს გვაქვს იჯარით აღებული ამავე სოფელში ძმ. ფალავანდიშვილებისაგან სახნავი მამულეები დღეს-ხვალდობით, რომელნიც არა გვეყოფის და განვიცდით გაქვიერებას უმამულობისა გამო, როგორც სახნავით—ისე საძოვრით.

მართალია დღემდის ჩვენ არ გვეშლებოდა საძოვრის, საწყლიპიროსი და ბუჩქნარი ტყეების სარგებლობა, მაგრამ რაკი ხიზნების ხელში გადავა ეს ადგილები და დაკანონდება, მაშინ ჩვენ მკვიდრ მცხოვრებლებს ხიზნები აგვიკრძალავენ ამ ადგილებით სარგებლობას და ძალაუფლებურად ჩვენი კეთილ-განწყობილება მათთან უნდა დაირღვეს და მასთანვე ჩვენი უმწეო ცხოვრებაც მით უფრო დაქვეითდება.

აი, ამიტომ მოგმართავთ თქვენ, სათათბიროს წევრნი, ჩვენ სოფ. ოქონის მცხოვრებნი, ხიზანთა საკითხის დროს იქონიოთ მხედველობაში ჩვენი მდგომარეობა და დასტოვოთ ის ადგილები, რომელნიც უნდა გადავიდეს ხიზნების ხელში—როგორც სასერვიტუტო ადგილები, საერთო სარგებლობაში ჩვენსა და ხიზნებს შორის, ე. ი., ჩვენ არ დაგვეშალოს საძოვრით და ბუჩქნარი ტყეებით სარგებლობა.

ეს წერილი ეკუთვნის გორის მაზრის, გომის საბოქაულოს სოფ. ოქონის მცხოვრებლებს 1914

წ. 10 თებერ. რომელზედაც ხელს ვაწერთ: და ხელს აწერენ სამოცდა სამი კაცი.

## მცირე განხილვა

ზემო მოყვანილ სოფლის საზოგადოებათა წერილებიდან მკითხველი ადვილად დაინახავს რამდენიმე მდგომარეობაში ჩაყენა მთავრობის კანონ-პროექტმა ხიზანთა დამოკიდებულების შესახებ ჩვენი გლეხობა. ჩვენ ჟურნალში დღეს იბეჭდება მხოლოდ ორი წერილი, მაგრამ მალე გამოვაქვეყნებთ სხვა საგლეხო საზოგადოებათა წერილებსაც, ასეთი წერილები გაგზავნეს სახელმწიფო სათათბიროში სოფელ დოესის და ხოვლეს საზოგადოებამაც. ეხლა, როდესაც ასე აშკარად ირკვევა სრული შეუსაბამობა ხიზანთა საკითხის ისე გადაწყვეტისა, როგორც ეს კავკასიის მთავრობასა სურს და როგორც ეს ჩვენმა დემოკრატიულმა პარტიებმა მოიწონეს, უფლება გვაქვს შევეკითხოთ ამ დემოკრატიულ პარტიებს: სად იყენენ ისინი და რატომ არ იცოდნენ მათ, რომე უთაც „ხალხში ღრმა ფესვები აქვთ გადგმული“, რომ ასეთი გადაწყვეტა ჩვენს ისედაც არეულ სოფლის ურთიერთობაში ასეთ არეულობას გამოიწვევდა. ჩვენ არა ერთხელ გამოგვითქვამს ის აზრი, რომ ხიზანთა საკითხი ისეთი უბრალო საკითხი არ არის, რომელიც შეიძლება უბრალო ბიუროკრატიული საშუალებით გადაწყდეს. ჩვენ არა ერთხელ გამოგვითქვამს ის აზრი, რომ ხიზანთა საკითხი ეხება, არა მარტო მემამულეთ, არამედ სხვა კატეგორიის გლეხებსაც. ჩვენ იმ აზრისანი ვიყავით, რომ ასეთი გადაწყვეტა ხიზანთა საკითხისა მემამულეთა ახალ კატეგორიის წარმოშობას ნიშნავდა, რომელიც მესამე პირთა ინტერესებს უსათუოდ შელახავდა. დღეს ეს თვით ცხოვრებამ დაამტკიცა. ჩვენ ხელთა გვაქვს ის დოკუმენტები, რომლებიც ჩვენს აზრს ადასტურებენ და ერთხელ კიდევ ზედმეტად ამტკიცებენ იმ აზრს, რომ ჩვენი დემოკრატიული პარტიები არ იცნობენ საქართველოს ეკონომიურ ვითარებას, მაგრამ ყველაზედ მეტად ჩვენ გვინტერესებს ის, თუ რამდენად მიაქცევენ ჩვენი დებუტატები ყურადღებას ამ საკითხს და როგორ შესძლებენ ამ საკითხის სწორედ გადაწყვეტას?

მთავარ პირობად ხიზანთა საკითხის სწორედ გადაწყვეტისა ჩვენ მივანიხილავთ ის, რომ უპირველეს-

სად ყოვლისა კანონ-პროექტი კავკასიის მთავრობას უკან დაუბრუნდეს ხელმეორედ განსახილველად. სახელმწიფო სათათბიროს ერთ ერთ კომისიაში უკვე იყო გამოთქმული ეს აზრი. მაგრამ მაშინ ნამესტნიკის წარმომადგენელმა ის აზრი გამოთქვა, რომ თუ ეხლავე არ გადასწყდა საკითხი და თუ ისე არ გადასწყდა, როგორც ჩვენა გვაქვს შემუშავებული, მემამულენი და ხიზნები ერთმანეთს დასჯამენო. კომისიას ამისი შეეშინდა და კანონ-პროექტი აღარ დააბრუნა. მაგრამ ეხლა როცა სხვა ფაქტორმა იჩინა თავი, როცა აქ სხვა კატეგორიის გლეხთა ინტერესები აშკარად იჩაგრება, ჩვენი დებუტატები მოვალენი არიან კანონ-პროექტის ახალი შედგენა მოითხოვონ.

## არ გვინდა ქართული ენა!

მე-II გიმნაზიის დირექტორისათვის მიუერთმეცია თხოვნა ქართველ მშობელთა ჯგუფს ქართული ენის გაკვეთილების მოსპობის შესახებ (გაზეთებიდან).

„*Italia omnia divisa est in partes tres*, მოსი-მოდა მოწყენილი ხმა საბავშვო ოთახიდან, სადაც კოკოჩკა, ბორის გლეხის ძე გადაგვარობისძეს უმცროსი ვაჟი, ლათინური ენის გაკვეთილს ამზადებდა.

ტატიანა გადაგვარობისძისა, ლეჩაქ ყურგადადებული, იჯდა მაგიდასთან და მეექვსედ პასიანსსა შლიდა: „მოვიგებ დღეს ლოტოში თუ არაო?“

— *Quo usque, tandem abutere Catilina, patientia nostra*, გაისმა მეორე ოთახიდან უმფროსი ვაჟის ხმა. ტატიანას მშობლიური გრძნობა გაეღვიძა და მძიმედ ამოიოხრა.

— წერილები ხომ არაფერი მოუტანიათ? იკითხა ბორის გლეხის ძემ და მძიმედ სავარძელზე დაეშვა.

— როგორ არა! აი, რადაცა უწყება მოიტანეს.

უწყების ხსენებაზედ ბორისს ათასმა შავბნელმა აზრმა გაუელევა. „კლუბში არ მიჩხუბნია, ფიქრობდა ბორისი, თუმცა ერთხელ ძალიან გადაკარით და უწესობაც მოვახდინეთ, მაგრამ... მაშინ ხომ შინაურულად მოვარიგეთ... ნუ თუ ლათინური ენის მასწავლებელმა მიჩივლა... მაგრამ ჯერ ხომ არ გამილანძღავს კოკოჩკას ორისათვის... ნუ თუ

ჩემმა „დულცინეიამ“ კიდევ შარი მომიღო... მაგრამ ის ხომ მაშინ ჩავაჩუმე: ოთხი „ეკატერინკა“ ჩაუღე... ტატიანამ რომ გამიგოს, ხომ კაი დღეს არ დამაყენებს... პირდაპირ საგონებელში ვარ ჩავარდნილი, რათ მიბარებენ სასამართლოში.— გულისფანცქალით, აიღო ხელში უწყება, დახედა და... გული დაუმშვიდა.

— მოწყალეო ხელმწიფე! მე-II გინაზიის დირექტორი ვიბარებთ თქვენ მშობელთა წრის კრებაზედ, რომელზედაც გაირჩევა საკითხი ქართული ენის ვაკეეთილების გაუმჯობესების შესახებ...

აი ახალი დარდი! რა ოხრად მინდა რომ ჩემმა შვილმა ქართული ისწავლოს.

— რაო? რაო? ბორკა რის შესახებ იქნება კრებაო?

— ქართული ენის ვაკეეთილისა!

— ჩვენ აქ ვცდილობთ, როგორმე რუსული შეისწავლოს ბავშვებმა, გაკაპასდა ტატიანა, სახლში ქართულად ლაპარაკს უშლი და დახე, იმათ გინაზიაში უნდა გააუმჯობესონ?! გენაცვათ რა დრო დადგა! არა, ერთი მითხარი რის გამოსადეგია ქართული ენა? აზირ, მუსიკა ასწავლონ ქართულის მაგიერ!

— ჰო, დედაჯან! შემოვიდა კოკჩკა ამ ლაპარაკზედ, ისეთი დაღლილები ვართ მეხუთე ვაკეეთილის შემდეგ, რომ არაქათი აღარა გვაქვს ხოლმე და ახლა მოდი და ქართველი რაკი ხარ, ქართული ვაკეეთილისათვის დარჩი. აბა რა ქირათ მინდა ქართული ენა? ჯერ სხვა მაწუხებს და ახლა ვილაცა რუსთაველის ლექსები ზეპირად ისწავლეო. უიმისოთაც თავი მაქვს გალაყებული ცეზარითა და ბუსლავეითა, რამდენსა ვცდილობ თავს ვიხეთქავ და ორზედ მეტს ვერ ვიღებ.

— შენ პაპიროსი კიდევ მოგიწევია?

— არა დედა არ მომიკვდება...

— ნუ სწყუი, მამ რად არის შენი ოთახი კვამლით გამოტენილი?

— დახე, დახე! ხელშიაც უქირავს, შეამჩნია ტატიანამ და ორივემ, შეერთებული ძალით, კოკჩკას ტანს მშობლიური დარიგება მშობლიურად აგრძნობინეს, რის შემდეგ კოკჩკა ნატკენ ალაგების ქექვით, ბურტყუნით თავის ოთახში გაემგზივრა.

— უნდა უშველოთ რამე ბორჩკა, თორემ ქართული ენა დაღუპავს ჩვენ ბავშვებს, ამდენი სწავლით სულ ფერი აღარ ადევთ, მეტადრე ვასიქას, რომ უყურებ, პირდაპირ თვალები ცრემლით მევსე-

ბა, შესჩიოდა ტატიანა და თან საათს უყურებდა: „კლუბში არ დაიგვიანდესო.“

— უნდა უშველოთ...

— მამი, ჩაურთო უფროსმა ვაჟმა, რომელიც კოკჩკას დარიგების დროს შემოსულიყო თავის ოთახიდან. ძალიან ბევრს დროს გვართმევს ქართული ენა. სწორედ იმ დროს არის როცა ცეკვის ვაკეეთილი გვაქვს. ქართული ენისათვის ორი ვაკეეთილი გამოუშვი. მუსიკისას ხომ ნურას იტყვი; რამდენი ხანია დიდ ოსმალურ დალაბანდზე არ დამიკრავს: სულ ქართული ენის ბრალია...

— კარგი შვილო, წადი ვაკეეთილები ისწავლე და დანარჩენი ჩვენ ვიცით, ქართულს ნუ მოამზადებ...

— დედიჯან, მე და პეტროვკა „ტანგოს“ ცეკვა ვისწავლეთ. აი, ესე იწყობა...

— უი, გენაცვალოს დედა! რა კობტადა ცეკვამ, ჩემო თვალის სინათლე!

— განცხადება უნდა შევიტანო დირექტორთან...

— ბარემ ეხლა დაჯექი და დასწერე, თორემ მერე გადაგავიწყდება.

— სადა მკალიან! აბა რა დროსია? შემდეგ როდისმე... „კრუეოკში“ დამიგვიანდება.

— არა უშავს რა, მოასწრობ წაგებას... ეხლაც დაჯექ და მერე ერთად წავიდეთ.

— ეხ, რა გაეწყობა, თორემ შენ ბურტყუნს ვინ აუავა!..

ერთი საათის შემდეგ ბორისი გამოვიდა კაბინეთიდან და ხელში დაწერილი ქაღალდი ეჭირა.

„მათ აღმატებულებას მეორე გინაზიის დირექტორს ქართველ მშობელთა ჯგუფის განცხადება“. კითხულობდა ბორისი: „ჩვენ, როცა მივაბარეთ გინაზიაში ბავშვები, ვხელმძღვანელობდით იმ მოსახრებით, რომ ჩვენი ბავშვები აღიზრდებოდნენ რუსულად და შემდეგ ყოველ გამოსადეგ საგანს შეისწავლიდნენ. დღეს კი, როგორც თქვენი უწყებიდან სჩანს, რალაცა ყოვლად უვარგისი და გამოუსადეგარი ქართული ენის ვაკეეთილი შემოვიღიათ და იმის გაუმჯობესობაც კი მოგისურვებიათ. თქვენო აღმატებულებავ, რა ჩვენი ბრალია რომ ჩვენ ბუნებამ ქართველად გავაჩინა, რომ ჩვენ ქართველმა დედამ გვშობა, ჩვენი სურვილის წინააღმდეგ, როდესაც ჩვენ სულით და გულით ქართველები არა ვართ. სამარტლიანობა თხოულობს რომ მშობელთა ცოდვების გულისთვის არ დაისაჯონ შვილები და რალაცა, უკაცრავლ პასუხია, ქართული ენით გამოულოყოთ

თავები. ამიტომ გთხოვთ თქვენო აღმატებულებავ, მოწყალების თვალთ გადმოგვხედეთ და მოსპვთ ჩვენი შვილების დაუძინებელი მტერი, ზნეობრივად გამათახსირებელი და გონებრივად დამქვეითებელი ქართული ენის გაკვეთილი.

სტატსკი-სოვეტნიკი ბორის გადაგვარობიქ.

— სხვებსაც მოვწყვრინებ ხელს და გაუგზავნი ღირეკტორს. ეხლა კი წავიდეთ?

და ეს ორი მგრძნობიერი მშობელი, გაბრწყინვალეული სახით, აღფრთოვანებულნი იმ ამაცი აზრით, რომ მათ შეეასრულეს დიდებული მისია შვილის აღზრდაში, მიეშურებოდენ „კრუეოკისაკენ“?

თრითინა.

## ვერონელი ქალი

ანატოლ ფრანსის

*Puella autem moriens dixit: „Satanas, trado tibi corpus meum cum anima mea“. (Quadragesimale opus declamatum Parisiis in ecclesia S-ti Iohannis in Granvia per venerabilem patrem Sacrae scripturae interpretem eximium Ol. Mailardum. 1511.)*

ეს ამბავი ნაპოვნია პატროსანი მამის აღონე ღონის მიერ სანტა კროჩეს მონასტრის არქივში, ვერონას.

ელეტა ვერონელი ქალი თვალად და ტანად ისეთი შვენიერი იყო, რომ ნაკითხი ხალხი, ისტორიისა და ზღაპრის მტოდნე, იმის დედას ხან ლატონას, ხან ლედას და ხან სემელეს ეძახდა. ამით უნდოდათ ენიშნათ, ვითომც მისი მუცლის ნაყოფი უფრო ვისიმე ზევისი დთვის ჩასახუდი იქნებოდა, ვინემც ვისიმე მომაკვდავის კაცი, როგორც იყვნენ ქმარი და საყვარლები სხუებულის ბანაოვანისა. ხოლო ვინც უფრო ბრძენი იყვნენ, მეტადრე მამა ბატისტა, — ჩემს წინ სანტა კროჩეს მონასტრის წინამძღვარად რომ ბძანდებოდა, — ისინი ჰტონებდნენ, რომ ეტოდენი ხორციელი სიტურფე ეშმაკის მანქანისაგან უნდა წარმომდგარიყო, რადგანაც ეშმაკი არის ხელოვანი, როგორც გულისხმობდა ნერო კეისარი. როდეს

საც სულთ-მებრძოლი ამბობდა: „რა ხელოვანი ვკვდებიო!“

და შეუძლებელიც არის კაცს რაიმე ეჭვი ჰქონდეს, ვითომც დთვის მოძულე სტანა, ლიოონის ხელსაქმარში სერხიანი, სორცის საქმეშიაც დახელოვნებული არ იყოს. თითონ მე, ამ წუთისოფლის საქმეებს დიდადაც საკმაოდ მტოდნეს, ბევრი ზარი და კაცის ქანდაკა მინახავს ადამის ტომის მტრის ნაკეთი. საკვირველი ხელოვნებისა იყო. დედაკაცის შვილებიც მინახავს, რომ ეშმაკის შექმნილი ეოფილიყვნენ. მაგრამ ამაზე უნდა ვსდუმდე, ბაკენი აღსარების საიდუმლობათ შეკრული მაქვს. ვიტყვი მხოლოდ, რომ ელეტას დაბადებაზე უცნაური მითქმა-მოთქმა იყო ქალაქში.

ის ქალი მე ჰირველად ვერონის მოედანზე ვნახე 1320 წლის წითელს ჰარსაკვეს, როცა თოთხმეტი წლის შეუსრულებულიყო მას აქეთ სსეირნობისა და ეკლესიებში შემსვედრია, სადაც ქალები დიარებიან ხოლმე. კაი ოსტატის ნახატს სურათსა ჰგვანდა.

ოქროს ფერი ხუჭუჭი თმა ჰქონდა, თეთრი შუბლი, თვლები იმ ფერისა, რა ფერისაც არის თვალი ჰატიოსანი, ბივრილად წოდებული, დაწვნი ვარდის ფერისა, ცხვირი სწორი და წვრილი. ბაკენი, კუშიდოს შვილდსავით, დიმილით კაცს უწელავდნენ გულსა; ნიკაშიც ბაკესავით მტინარი ჰქონდა. როგორც იმის აშოკის საამებლად სასურველი იქნებოდა, ტანი ისე ჰქონდა აგებული. ტუბები, არც ძალიან დიდრონი, ორის კავილის და ნარნარის სიმრგვლით ჰერანგში გამობორცოდა. ჩემის სმდვით ხარისხის გამოისობით და იმიტომაც რომ ის ქალი თუ არ ჩანმულ-დახურული მე არ მინახავს, იმის ტანის სხვა ასოებს აღარ ავიწერთ, თუმცა მათი საუცხოობა ტანისამოსშიაც სჩანდა.

გეტყვით მხოლოდ, რომ როცა ელეტა წმინდა ზენონის ეკლესიაში თავის ჩვეულებრივს ადგილზედ ლოცულობდა, ისე მუხლს ვერ მოიფრიადა, ისე ვერ წამოდებოდა, ან სიწმინდის ნაწილთა ამაღლებაზე ისე ჰირქვე ვერ დემხობოდა, რომ კაცებს მამინვე გულში არ ადგზნებოდათ ფიცხელი სურვილი მისის ჩახუტვისა.

თხუთმეტის წლის იქნებოდა ელეტა რომ ბატონს ანტონიო ტორლოტას მისთხოვდა. ეს იყო ვერონელი ადვოკატი, კაცი დიდად ნასწავლი, სახელ-განთქმული და მდიდარი, მაგრამ ხანში შესული და მეტად სქელი და უგვანო. ის რომ თავის ქადალდებით სახსე ტყავის-ზარგაკიდებული გენახა, ვერ იტყოდი იმ ორ ზარგში რომელი ერთი მიათრევეს შეორესა.

გული საცოდაობით გეწოდა, როცა მოგაკვებობდა რომ ქორწინების საიდუმლთა ძალით, რომელიც კაცთა დიდებისა და საუკუნო ცხნებისათვის არის დაწესებული

ბული, უშენიერესი ქალი ვერონის გვერდით უნდა სწოლდა ისეთ ბებერს, მიხრწნილს და დავარდნილ კაცს. და ბრძენთაც იმდენად არ გაჭვირვებიათ, რამდენადც სწეენათ, როცა შეიტყეს, რომ სწამ ბატონი ანტონიო ტორლოტა სამართლიანობის და უსამართლობის გამორჩევაში დამეს ათეუბდა, მისი ნორჩი ცოლი ქალაქის საუკეთესო შოეშეებს ლოცინში იწვენდა. მაგრამ რასაც მაგაში ელეტა სიამეს ხედავდა, თავის თავისკან მოსდიოდა და არა იმათგან. ის საყვარლებს კი არა, თავის თავს ჭეყარობდა. თავისი ტანის ტრფიალი იყო და თავისივე თავის სურვილი, გულისთქმა და ლაქუცი.

ამიტომ, მგანია, იმისი ხორციელი ცოდო მეტის მეტად მძიმე უნდა ეფიდიყო. რადგანაც, თუმა ეს ცოდო გვაშორებს ღმერთსა, მაგრამ უზენაესი მსაჯული საქაო და საიქიო ცხოვრებაში მანც ისეთის რისხვის თვალთ არ უუურებს ხორცთმოფარეთ როგორც ძვირთა, გამცემთა, კაცის მკვლელთა, და ბოროტთა, სიწმინდის მოგატრეთა; იმიტომ რომ ავხორცთა ბიწიერი სურვილი სხვისგან არის გამოწვეული და არა თვით მათგან და ცნადჭოფის მათს გულში დაშთომილს ტეშმარტის სიუყარულსა ღმრწავლებას, მხოლოდ შებლაღულს.

ელეტას მრუშობაში არაფერი ამისთანა არა სწანდა. ამიკობაში იმას თავის მეტი არავინ უყვარდა, და ამიტომ უფრო დაშორებელი იყო ღმერთზე, ვინემც ეგოდენი სხვა ქალები, რომელთაც თავიანთ გულის ნდომას ვერ გაუძღეს. ხლო მათი გულის ნდომა სხვისგან იყო, ელეტასი კი თავისივე თავისკან. ამას იმისათვის მოგახსენებ, რომ ამბის შემდეგი უკეთ შეიგნოთ.

ოცის წლისა იყო ელეტა, რომ ავად გახდა და იგრძნო რომ სიკვდილმა უწია. მაშინ გულმდუღარედ მოიტირა თავისი ლამაზი ტანი, მახსლექებს ძვირფასის ტანისამოსით მოაკაზმინა, სარკეში ჩახედა და ორივე ხელი მკერდსა და თქიკებზედ მოისვა, რომ თავისივე სიტურფით უკანასკნელად დამტკბარყო. და რადგანაც არ უნდოდა რომ მისი სათაყვანო ტანი ცივ მიწაში ჭაღლის კერძად გამხდარიყო, სულთმებრძოლმა დიდის სარწმუნოებითა და სასოებით ამოიხზრა და სთქვა:

— სატანა, საყვარლო სატანავ, წაილე ჩემი სული და ტანი. სატანა, ჩემო ტკბილო სატანავ, ისმინე ჩემი ვედრება: ჩემი ტანი ჩემს სულთან ერთად წაილე.

მიცვალებული წმ. ზენონეს ეკლესიაში მიასვენეს,

ჩვეულებისკან შირახდილი, და არც ერთს ხორციელს თავის დღეში არ ენახა ასეთი შენიერი მკვდარი. სწამ მღვდლები ახდერძს უკებდნენ, ისე იწვა თითქო უხილავის საყვარლის ხელში ეშხით მიხნედილათ. წირვის შემდეგ კუბო დაბეჭდეს და მიწას მიაბარეს სხვა საფლავებს შორის წმ. ზენონეს ეკლესიის გადავანში. მაგრამ შორე დღეს ელეტას საფლავი ამოთხრილი ნახეს და კუბო გახსნილი და ცარიელი.

ალ. სარჯიშვილის ნათარგმნი.



## უკანასკნელი ამბები

ორშაბათს, 24 თებერვალს, საღამოს 8 საათზე თავ. აზნაურთა დეპუტატების საკრებულოში (ბელინსკის ქუჩა, № 2) მოხდებოდა საქართველოს საისტორიო და საეთნოგრაფიო საზოგადოების წევრების ჩვეულებრივი საზოგადო კრება, რომელზედაც წაიკითხვენ რეფერატებს: დეკანოზი კ. კეკელიძე სალიტურგიკო მოღვაწეობა ანტონ I კათოლიკოსისა, ლ. მელიქეტაბეგოვი — „სომეხთა მოქცევის“, ქართული თარგმანი მე-VI საუკუნეში და იუსტ. ირ. აბულაძე ვეფხვის-ტყაოსანი. ჩვენს საგანძურებში არსებულ ხელნაწერების მიხედვით. ამასთანავე იქნება ახალი წევრების არჩევნებიც.

კრებას გარეშეებსაც შეუძლიანთ დაესწონ.

## ახალი წიგნები

გამოვიდა და იყიდება „საქართველოს ცხოვრება 1469—1800-მდე ბატონიშვილი ვახუშტისა. წიგნს დართული აქვს ოცდა-თორმეტი სურათი მეფეებისა და სხვა გამოჩენილ ძველ ქართველთა. ორიოდ სურათის გარდა ყველა პირველად იბეჭდება. მეორე წიგნი ქართველ მაჰმადიანთ შეეხება და ძვირფასი საჩუქარია იგი მათთვის: გამოცემა ეკუთნის ჩვენს დაულალავს გამოცემელს და მოლავაწეს ზ. კიკინაძეს.

ორი საერო თქმულება. 3. მირიანაშვილმა

გამოსცა აბესალომ და ეთერის და როსტომის ლექსები. ამას წინად კიდევ მანვე გამოსცა ამირანის ლექსები შ. ქიქოძის მიერ დასურათებული. მადლობის ღირსია ბ. მირიანაშვილი ამ სასარგებლო შრომისათვის; დრო არის შევროვდეს და გამოიცეს ჩვენი ძლიდარი საერო თქმულებანი.

რედაქციას მოუვიდა ახალი თხზულება ბ. სიმონ ქვარიანისა — „შოთა რუსთაველი და მისი პოემა“. წიგნი სუფთად არის გამოცემული და ღირს მხოლოდ ექვსი შაური. მივაქცევთ მკითხველ საზოგადოების ყურადღებას, რადგანაც წიგნში სრულიად ახალი შეხედულებაა გამოთქმული შოთა რუსთაველისა და მის თხზულებაზედ დაწკრილებით განხილვას წიგნისას შემდეგ ნომერში შეუდგებით.

# რედაქციისათვის

ვისაც ქუჩნალი არ მისდის უმორჩილესად ვთხოვთ დაუეოხებლივ აცნობონ რედაქციას ზომების მისაღებად.

რედაქტორ-გამომცემელი

რ. გაბაშვილი.

1894 წლიდან

1914 წლამდის

ს ა უ კ ე თ ე ს ო დ ვ ი ნ ო დ ი თ ვ ლ ე ბ ა დ ვ ი ნ ო

საზოგადოება „კ ა ხ ე თ“ -სა

ტელეფონი:  
№ 73 და 3—51.

თბილისი: გოგოლის ქუჩა 63  
და ერევნის მოედანი.

განყოფილებანი: ბაქოში, ასხაბადში, ტაშკენტში, მოსკოვში, ბათომში, რასტოვში და სხ.